

四庫全書

集部

欽定四庫全書

集部

林惠堂全集卷

二十一

詳校官檢討

臣

劉錫五

助教臣常循覆勘

總校官編修

臣

王燕緒

校對官助教

臣

卞維吉

謄錄監生

臣

戴

典

欽定四庫全書

林蕙堂全集卷二十

湖州府知府吳綺撰

亭皋詩集

七言律

楊香山郡丞招飲廣福僧舍

白雁傳霜夜氣高
禪林相對首頻搔
客中召客情逾厚
人外同人興倍豪
半世青衫傷艷曲
三更紅燭引醇醪

與君同是飄零者莫待西風讀楚騷

喜茅天石至即和原韻

清溪曲曲繞黃田每為懷人悵各天孤舫江頭來細雨
一簪花裏話寒烟當年官跡空留夢此夕鄉心暫解懸
風雪漫漫人漸老客意猶喜對牀眠

石霞招同昉思儔夏殿臣集南山書屋

月華澄霽正冬初偶集幽齋旅思舒時歷煙霜盤有袖
地兼江海食多魚遊人遣興千鍾酒高士傳家一卷書

此日歡呼須盡醉
臨邛誰識漢相如

題定峰所著

笑看侯門恥曳裾
定山高卧灌園蔬
手披今古無窮史
力創乾坤未見書
傳就滑稽應復爾
歌成樂府更何如
我來得此稱奇絕
漫比珊瑚賦子虛

元旦憶家

吳天鐘動見朝熹
客邸幽棲與性宜
呵殿驚聞朝士早
焚香翻羨道人遲
多情未免因鄉里
久處何堪易歲時

屈指古稀今日是心同枯木漸無枝

偶吟

信步寧知所以然不求禪解不求仙
疎狂自在三千界頑鈍于今七十年
近日行藏惟酒盞他時毀譽任詩篇
雙眸何意重清朗未了蟬魚夙世緣

上元前一日雨雪和宋長白韻時有國喪

無數銀龍戰遠空漫天飛舞各匆匆
山河若為銜哀白燈火難因錫慶紅
萬戶烟花迷曉月九衢簫鼓咽春風

一匙社飯無窮事擁褐愁吟碧海東

又

茂苑羈栖鬢已華
藍珠天上望瓊花
閒庭有跡來仙鶴
老樹無枝着冷鴉
貰酒未能空近市
圍爐少緒欲思家
龍門不遇錢惟演
白醉頻煎陸羽茶

春仲同菊人廣霞集飲王大席廣文署齋共用
起句賦詩

三老二百二十歲就中如我尚隨肩
顏同單豹寧嫌瘦

氣較元龍或似前蹤跡每于閒處合文章猶幸在時傳
主人莫謂無兼味金谷何能及此筵

又

三老二百二十歲高齋同吸洞庭春青瑣研北無多客
白髮江南尚有人飽識世情因歲久驚看塵事逐時新
飲醇且盡清宵醉莫恨金昌折柳頻

道過梁溪訪憶梅軒與姬人小憩

曰歸忽已及春殘偶過蓉湖繫木蘭才子意從眉黛得

離人都入畫圖看花因蝶胃停偏久柳為鶯來折更難
桃葉明朝渡江去欲吟團扇向誰歡

顧書先招同宗梅岑諸子集飲郝園園即空翠
閣舊址時孔東塘國博後至

襟襖何堪觸暑遊為君乘興到林丘亭臺已逐新人改
風月難將往事留滿引敢辭長慶老豪吟不解杜陵愁
況逢穎達能相好愛看青山共倚樓

同賓三夜坐

沿江烽火一間身小院追涼遠俗塵竹影干雲天欲碧
桐花滿地月如銀時窮到老惟思靜世亂還家不稱貧
四海茫茫誰可問與君聊進一杯醇

懷豐攜具同諸子飲純鄉舸分韻得鄉字

子荆高致不尋常蠶榼攜來坐晚涼桐葉碧喧過急雨
竹梢紅剩裊殘陽隋橋正有吹簫恨漆室徒煩倚柱傷
金壘滿前須酩酊肯教薄醉不成鄉

送賓三歸皖江

送君歸去欲何之
梅雨橫江一棹遲
客裡依人原計短
亂中回信恐家移
路遙莫問三江水
裝薄惟存數首詩
我亦繞枝無可托
月明空約再來期

萸江秋禊偕諸同社作分得十四寒

新涼寧不勝春闌
觴詠于今倣建安
二七秋時天氣朗
十三樓畔水烟寬
滿裙豈易當銀漢
泛酒猶能託彩翰
我是樊川舊遊客
來遲無復怨花殘

蕪城秋望分得二蕭

秋氣西來草木凋紫藤攜得上岩堯三山夜月螢千個
六代春烟柳幾條帝子游殘空有恨參軍賦後更無聊
平生亦是途窮客廣武何堪極望遙

月下

蟋蟀聲聲啼晚霜主人清夜宿空堂偶聞露滴竹搖檻
坐待月來花到牀起舞不堪歌卓帽醉歌何處擁霓裳
山妻笑把葡萄醞一字吟安勸一觴

送朱亶初廣文內擢翰院

綸扉幾日拜恩初
負弩旋看擁傳車
宋代楷模推武仲
漢廷詞賦待相如
青門柳密秋行酒
紫府花深夜校書
到日故人應借問
東籬菊蕊近來疎

中秋

桂魄圓時秋正中
彩雲銷盡出長空
五更欲滿人人望
四海誰知處處同
繞地樓臺皆似水
沸天絃管不因風
況逢江楚波濤靜
爛醉何煩蠟炬紅

中秋後一日偕東塘宣初其恭集克敏堂小飲

分得書字

豈分蓬門駐轡車清談聊復剪園蔬秋光暖剝涼回後
月色晴添雨過初離緒欲求千日酒交情常檢十年書
莫言此會惟粗糲俯仰乾坤思有餘

秋感

無端客思忽蒼涼日日西風送夕陽二十朱顏門下老
三千白髮鏡中長心空但覺雲過眼面冷寧知雪作腸
不夢春明緣底事堦前絡緯正啼霜

又

絳節深居白九閭瓊樓玉宇意空存身如鬪蟻時能戰
心似窮猿夜欲奔不熱何嫌塵滿甌長貧那得酒盈尊
江南最是傷情地只合移家住陸渾

又

檻外聲聲落葉頻新來雞骨漸嶙峋乾坤獨剩捫餘腹
金鼓空留醉後身四海難求生白處一時那得尚玄人
昨宵對酒還長嘯半畝寒花月似銀

又

擬拜槐安竟未成苦吟猶賴送餘更看殘野馬書空掩
叫煞寒蟬枕自橫風雨浪傳孤劍吼波濤時令畫船驚
百年擾擾紅塵裏矯首扶桑曙又生

丁雁水臬憲拒偽棄家奉

命入都遙贈五章

六年離思隔千峰每憶情高嘆莫從豈謂烟塵能蔽日
原知江漢定朝宗人間塞馬真難料天上雲鴻未可逢

書至一時憂喜并亂中裝薄問誰容

又

變起呼庚震九垓多君壯氣獨難回
踉蹌皂帽兵間出辛苦麻鞋賊裏來
未死已知三不負無家寧有七堪哀
羞看百草當秋後一陣西風一度摧

又

江干鐵騎亂如麻間道潛蹤信可嗟
甘死豈知能不死全家應是為忘家
泥塗躑躅人千里妻子飄零水一涯

疏奏早知

天子識平原若此復誰誇

又

海立山飛在一時純臣仗節豈能移題詩忍效王摩詰
念

主還同杜拾遺好友沿途分短褐行人遮道看鬚眉良
朋競奏驪駒曲折柳翻嫌勸駕遲

又

種得甘棠絕世塵遷官原不出

楓宸能排萬里滔天浪並顯生平蹈海身自古亂離知
國士于今忠孝得詞人蒼生均切為霖望環賜寧惟下
漢濱

次劉季英登報恩寺浮屠

萬壑千峰入望齊振衣橫眺意長迷都無王氣餘江左
只有斜陽過水西白馬殿荒前代礎赤烏碑換舊時題
蕭蕭金鐸風前語遙和臺城野鳥啼

又

琉璃高峙百千尋遠望鍾山積翠陰
劫火自留三月燼鐘聲猶帶六朝音
此時城郭堪懸眼何處風光足賞心
獨有雨花臺畔草春來烟色未銷沈

次劉季英江南春興

秦淮烟月黯然收白鷺飛殘出遠洲
青蓋漫傳前代恨烏衣寧復少年遊
半江春水千尋鎖幾夜東風百尺樓
戰鼓亂鳴渾未覺祇緣天子自無愁

又

水滿清溪浸綠雲
鈴搖九子不堪聞
人才那用如安石
國事憑誰付仲文
陌上牛羊朝作隊
湖邊燕雀晚成羣
人間埋照非容易
風味終須愛麴君

登海嶽樓次王阮亭韻

大江日夜滔滔去
吳楚乾坤有此樓
南北風雲隨岸盡
古今烟月逐年收
袁生歌板成高調
魏帝旌旗失壯遊
倚檻便須重作賦
從來心事恥悲秋

甘露寺次石淙楊先生韻

北固青青猶似昔我來登眺已多年論兵慷慨留山月
弔古荒涼拂水煙戎馬難消亡國壘沙鷗長避渡江船
不須更覓高僧話白眼何人亦解禪

登崑山次高陵韻

捫葛攀蘿一徑微幾年曾此扣禪扉蒼巖笑我行將老
白鳥迎人却更飛溪月自然能耐晚山雲何事不知歸
五湖多少秋風在欲剪殘荷補素衣

寄江辰六

層巒八九綠氤氲何處支頤若所聞
簪嶺自懸仙境月蓮峰猶憶故山雲
客來共把青尊對吏散還將險韻分
見說江梅花正發一枝寧不寄殷勤

其恭偕武徵東湖高陵攜樽過種字林為持螯之會

論文清夜更論詩剪燭虛堂此一時
偶觸壯心因泥酒未忘機事為看棋
寒新孤雁空遺響秋熟雙螯好共持

不是故人多雅興長宵應便惹相思

秋感次東湖韻

寒梧瘦竹弄秋暉小徑蓬生過客稀老子自應甘墨守
道人無復想雄飛燈前酒竭青磁甕雨後泥深白板扉
盡日彈琴無一事雙眸長送晚鴻歸

又

屋角牽牛覆短檐筆床茶竈老江淹聽殘細雨惟燒燭
過盡浮雲不捲簾夢苦自應難對酒梅酸何必更和鹽

甘窮豈合將詩罪險韻時時信手拈

又

矯首鵷鷺滿大都山中音信竟全無交遊此日空三徑
骨相從來合五湖月上更憐秋水闊天高何礙暮雲孤
香龕經卷年時好彌勒猶能伴老夫

又

黃金無復更遊燕醉卧柴桑二十年止酒惟能成半夢
催租真欲費全篇行藏但恐前人笑文字寧須俗客傳

只愛山中好明月一回相見一依然

九日同人梅花嶺登高分韻得十二侵

正見清霜兩鬢侵快逢佳節且登臨空傳白雪無餘跡
不負黃花獨此心短髮早知羞未已壯懷徒抱不堪吟
從來秋色關天地一會龍山直至今

同人集克敏堂聽孔東塘先生述石門山孤雲
草堂之勝以詩贈之

見說茅堂住碧岑當年出岫本無心鶴書未許聽松卧

龍阜曾勞拂莽尋，遂有星辰知客傲。
祇緣山月待人深，一時舉酒皆名士。
東望同登梁父吟。

立春雨和高陵韻

細雨爭春不讓先，瀟瀟撼撼攪晨眠。
紅顏漫自矜佳節，白髮寧堪逐少年。
但得日供三雅爵，寧須常看一囊錢。
試觀來日如酥影，漸到天街細草邊。

咏雁

蓼紅沙白日相呼，毛羽秋來性獨殊。
萬里鄉關惟雨雪，

一生蹤跡在江湖稻梁多處人情險蘆葦深時野夢孤
何似寥天千歲鶴芙蓉峰上頂如朱

張偕石陳鶴山攜尊集種字林

高懷如爾信難儔春至先為醉客謀載酒竟過揚子宅
傾囊不惜馬卿裘偶探好句爭傳寫共愛深情任拍浮
從此西園稱勝事南皮寧復羨應劉

尋梁溪周二娘墓為詩弔之次黎生韻

兔狡狐綏竄野榛傾城艷質已長窀可憐梅影搖寒月

誰把椒漿奠早春情在空留金鏤枕魂歸應泣繡羅巾
雲英不嫁千秋恨腸斷青衫我輩人

又

邇陌荒涼邇水清夜來常聽怪禽鳴春殘茂苑花無主
夢醒巫山雨不行此日燕釵真欲化當時鸞鏡已難明
稠桑縱得遺裙在那有空庭勃率聲

送李兒赴均陽兼寄辰六

雪霽天涯客路開楚山南望綠崔嵬蒼頭倚轡催長發

白髮垂堂盼早來
庶吏無家空戀闕
離人易感莫登臺
此行若過南陽道
好向龍岡酹一杯

重和阮亭迷樓懷古

當年清夜記宸遊
劫火惟存莽一丘
作賦詞人空雪涕
吹簫天子自風流
旃檀有法長開院
楊柳無情不上樓
却笑興亡等飛絮
一番東澗又西溝

又

總是繁華跡
易荒臺邊秋露濕
荷裳風光處處花埋雨

春色年年草滿岡，千步畫欄人事改。
一聲金磬客心涼，可憐懷古情多少。
費盡詩人百結腸。

訪張次錢深柳堂戲書所見分得二蕭

城南春水碧迢迢，高士幽棲近板橋。
草色多情邀客醉，柳絲無力倚人嬌。
波堪掠燕方三月，地有啼鶯自六朝。
入坐一時皆善賦，綠烟深處掛詩瓢。

閨上已

已敲槐火過雲龕，穀雨花開色正慙。
浮世幾逢春百二。

佳辰又見日重三
湔裙水上添新漲
捧劍波心異舊談
寄語永和諸勝客
茂林修竹更須探

漫成

幽境時無客
過從禪關猶得暫
從容閒尋徑
筍遙驚犬
偶插瓶花故惹蜂
睡起避風門
欲掩吟餘待
月酒初濃
山僧似識淵明意
廬阜于今不打鐘

冷松邀集記捫軒時有歌者茵姬在座

程鄭門高不迓賓
桃花潭水遇汪倫
菰蘆江上傳佳話

櫻筍筵前有麗人短燭三更聞急雨清歌一曲舞輕塵
習池倒載尋常事長笑同歌白鷺巾

送冷松先歸新安

彥章南去布帆斜麥秀風高下白沙我為憶家聊作客
君將送客反離家鄉關遠出千重樹山岳晴分一片霞
先報故園諸父老好排鷗鷺待歸槎

五月二日同人集克敏堂送藥亭歸海南東塘

還朝南村入九華山修志分得十二文

時與會者

十五
人

榴汁初成酒色醺一時河朔共殷勤
星辰象合天長聚
江海情多路暫分
風雅幾同周列國
雲光如見薊仙君
可堪更作陽關曲
一疊離歌一處聞

端午後六日攜家小泛時尚有競渡者

江波新漲麴塵初
蘭漿浮家興偶舒
稚子都隨書畫舫
老妻偏愛水雲居
柳絲上下爭啼鳥
荷葉東南有戲魚
誰問沈湘千載怨
只教年少鬪鳬車

竹醉日小集冰持肥園寓齋共用韋端已韻

一片帆吹荷芰風重城人聚桂堂東
箋憑銀鹿時時送酒換金魚夜夜同
誼合不知交似漆醉多常笑卧如弓
何堪跋扈飛揚意未肯當杯作老翁

又

不教花圃欲連壕獨愛幽栖遶雪濤
赤日不來松竹冷綠波新漲芰荷高
舟停檻外常尋戴酒瀉林間好讀騷
漫說輞川多勝事輞川當日少吾曹

步宗梅岑韻題賈孚遠西山別墅圖

不愛紅塵過碧山二分明月屋三間
偶因野竹開疎徑却倩寒雲為閉關
驢背新詩逢客問鷗邊殘日伴僧還
我來欲訪歌騷處遙指隋橋第幾灣

虎丘姜貞毅先生諫草樓

青山無恙是君恩小閣嵯峨倚夕暎
當日避人焚未了此間報國氣長存
文章豈願傳千古忠孝由來共一門
却怪杜鵑如識字時時檻外灑啼痕

楚烈婦挽詩婦以餓盡節

亂起黃巾國步艱深閨就義萎紅蘭壯夫志在戈空挽
烈女心堅粟忍飡天日尚留前代憤冰霜猶作異時寒
崇坊永表千秋勸填海魂歸掩映看

咏雪擬東坡义尖二韻

一陣嚴寒旋旋添堦前夜積水晶鹽彩箋染墨愁毫禿
紅袖翻香露指尖饑雀有聲迷凍瓦歸鴻無影落空簷
痴童漫自攜蠻榼不見臨邛賣酒帘

又

密霰隨風入謝家梨雲碎剪作冰華鴛樓莫認重欄跡
兔窟難尋古路義庭飭倒垂光灼灼簾旌微動影斜斜
灞橋恐有尋詩客欲種林逋繞屋花

又

陰重翻憐曉色嚴襄陽驢背獨心忼遙看極浦沙千里
晴見危峰翠一尖豪客圍爐爭按曲美人呵鏡懶開奩
寧知尚有孫康在檢盡寒齋字幾籤

又

疎疎密密勢還加盡把人間捷徑遮西嶺風高添鶴柵
南湖冰厚攔魚叉何人更掩凝寒戶幾處曾停逐熱車
我是袁安初學懶敢同高士卧烟霞

又

飄飄寒影透疎簾漸覺晶瑩滿四檐縞帶千行翻素練
錦鞋雙跡印紅尖寒多更覺吟肩瘦凍徹偏宜飲興甜
只愛漁翁江上去一蓑新被白雲粘

又

何處飛來六出花
梁園一夕望偏賒
遠山帶雨分層壑
老樹搖風出半叉
壓損竹梢妨着屐
掃同梅瓣好煎茶
登臺把酒叫奇絕
此日乾坤寂不譁

仲冬念八日家巢薇侍御過集種字林偕高陵
念昔仲子分得魚歌二韻

滿徑寒蓬賦索居
淹留惟恐綠樽虛
豸冠忤俗名偏重
鴻羽闕情誼不踈
此夜笑談干象緯
他年蹤跡伴樵漁

欲知別後相思事，檢盡松窗幾卷書。

又

張衡愁緒近如何，此日相逢且放歌。
天下尚留吾道在，雪中誰許俗人過。
青衫幾載傷萍梗，紅燭三更點薜蘿。
待得梅花消息好，金牛湖水麴塵波。

舟中聞雁全正持作

孤客傷多正憶羣，中宵愁聽思紛紜。
稻粱有恨音偏苦，江海無家跡又分。
歲晚那堪千里月，天高嘗隔萬重雲。

紅樓亦有笙歌侶醉向燈前似不聞

送汪舟次太史奉使中山

諭蜀何煩羨馬卿
緋駟夾道送君行
裝從南越臺前盛
文向東坡海外成
島嶼豈期才子見
波濤終為聖人平
獨憐異國相思處
萬里蓬壺月又生

東淘訪舊不遇

小樓燈火夜橫陳
夢醒揚州幾換春
十載浪傳天上信
一生常負月中人
歌成白紵惟餘響
淚裹紅綃點暗塵

海角茫茫空徙倚願留香穗種來因

將發東亭留別淑晦

訪戴時維剡曲舟感君情重為遲留幸當潦倒逢青眼
莫道英雄易白頭五夜雞聲常對酒幾人猿臂早封侯
相看各話平生事老氣猶能壓九州

過俞錦泉流香閣觀劇

無限春風上襪羅洛神曾見賦東阿偶停殘歲青簾舫
來聽良宵白苧歌座上狂夫多小鳳屏前仙子盡長蛾

紫雲不識今誰是但倒金尊喚奈何

錦泉席上贈長君陳芳

蕭瑟江關久索居偶來花下一停車燕鶯隊裏逢名士
歌舞場中得異書年少誰能過賈誼多才應更似相如
子雲得從長楊獵頭白猶然較石渠

立春日畢正持攜尊見憫分得八庚

春入端居草未生感君挈榼重將迎人如昌谷寧無歎
客似高陽獨有情憂以醉忘終是暫慨因歎觸更難名

持杯為向梅花語莫倚寒窗惹不平

江夏君視女未歸元夜不寐有感

六街簫鼓正喧闐酒醒中宵竟不眠
風便漏聲傳枕上月明花影到牀前
紫姑漫說今年勝青帝難教舊夢圓
聞道重城燈火盛一時如向客心然

二月九日登南城樓看雪仿禁體

容易登高為傍城雪中披氅步峻崢
眼難極地那言曠身欲近天方覺晴
六代烟花都寂靜萬家樓閣轉分明

清寒更有添豪興
湖海從來氣未平

上巳日雨中言懷

一雨無端節序更
淒淒惻惻暮寒清
釀成草色何勞遠
落盡梅花不肯晴
南苑幾人曾撲蝶
西園何處好聞鶯
春來算有愁難浣
莫為滿裙傍水行

兀坐

兀坐西齋戴鶻冠
半春蕭瑟已無歡
寒欺病骨分千痛
雨入愁心並一酸
芳草漸于行處密
好花羞向悶時看

新來檢點吟囊事客夢荒唐筆益乾

送葉井叔歸里

隋橋垂柳布帆欹夢得銜觴感路岐客況不堪沽酒少
歸裝偏為買書遲雪堂水漲魚肥日月觀花深燕乳時
兩地相思知未免可能重寄四愁詩

送呂半隱

曲江當日手親題老向荆南獨杖藜菊自晉花猶滿把
瓜留秦種漸成畦難將往事論蘇李賸取高風似阮嵇

遙望故鄉休下拜杜鵑仙魄不重啼

又

隋堤楊柳畫溪藤兩地論交得未曾笑我世情隨日淡
羨君詩興逐年增因耽白社尋廬阜愛寫青山為武陵
今日相看須進酒小花蠻榼可三升

用看奕軒韻示內子江夏君

一字媒成一笑初牽紅初事下田居能傳嬴女吹簫曲
自答秦嘉餉鏡書青眼獨看雲裏鵠白頭長饌井中魚

誰憐四海渾無有臺上橫琴獨晏如

又

委巷由來不治生堂前空有鹿門迎丈人正得黃承彥
夫子何如馬長卿窺牖早知才具遠停機偏識揣摩成
天哀志氣憑誰信掃得饑寒即盛名

又

行路難如蜀道般棄繻曾共入秦關年年割肉逢春社
日日將眉畫遠山解珮時留佳客醉敲針初得小兒頑

乘風破浪非吾意却過明湖學士灣

又

十年全踏軟香塵豈料能逢洛下春
南內一行稱命婦東方千騎擁仙人
簞當竹筍供青案罨畫銀花點繡巾
勢位一時安可忽那知螻蛄竟誰真

又

剖得麈符向兩谿持盈常恐夕陽西
荷鋤每欲全埋鹿推枕何曾待聽雞
燭秉研旁秋淚濕香焚臺上晚煙迷

東風吹醒東坡夢只羨堦前玉樹齊

又

散珮翻成負戴隨含沙寧復計云誰剛知王子終難免
好憶虞妻不可為患難輸君能學道清貧似我獨心知
高山流水音空在賴有蛾眉鍾子期

又

年年老屋要牽蘿愛爾秦聲和醉歌不罵章惇心自遠
曾教許允智偏多看山共坐蜻蛉舫典酒頻銷蛺蝶羅

剪得支硎雲一片燈前為補舊時蓑

又

療貧那得有奇方勸我逢人莫便狂
眉黛瘦來翻自解頭皮留得豈須忙
閒開修竹林中館老愛菩提樹底坊
只有不平洗未盡呼兒還滌掌中觴

用前韻贈澹心

風度看君似太初玉蘭花裏近移居
喜聞天下多情事徧覓人間快意書
竟日橫船惟放鶴有時彈鋏尚歌魚

茂陵不少雕龍客作賦文園更孰如

又

春風春雨亂愁生縱有高軒不肯迎南面擁書誰是主
北窓支枕莫相卿新詞獨許柳三變老友無過陶九成
近與長沮還有約耦耕偏愛不知名

又

著得奇書有幾般手攜常自訪雲關挂瓢桂樹生公石
壓帽梅花鄧尉山亂後久擗甘寂寞老來全不減疎頑

金庭何處容偕隱更欲移家銷夏灣

又

石城烏榜泛雲谿歌吹揚州古竹西十里長堤春試馬
二分明月夜談難東山別墅逢花住北海清罇對酒迷
今日羊曇空折筮白楊高與畫樓齊

又

水嬉湖畔日追隨授簡當時更有誰得酒只令名士共
無錢安用好官為三年玉局人難識一片冰壺爾獨知

短夢亂山今已覺東籬還訂菊花期

又

寧知隔巷接藤蘿日日花間共和歌皂帽有心詞客在
青衫無恙酒人多買成江上新魚具踏破門前舊雀羅
我有離騷向煙雨隣家應更借青蓑

又

舉世求圓欲毀方市人爭笑兩生狂
苦耽竹葉連朝醉一見桃花盡日忙
浪蕩每尋平樂館風流誰羨永豐坊

勸君莫洒西河淚三萬六千時舉觴

戲擬無題

鞦韆過後落花初青粉牆圍道韞居紅紙半題吟剝句
繡床橫疊讀殘書簫緣少和難招鳳字有相思莫剖魚
誰遣錦江春水滑掃眉今見女相如

又

也知才調不虛生何意偏將薄笨迎世有伯鸞應得汝
人非司馬敢呼卿含啼暗擲金條脫選夢難求翠織成

惆悵仙鷺隔烟霧教人愁絕是空名

又

種得離愁似草般春來到處映花關那知弱海三千水
竟隔巫陽十二山思婦淚殘花欲死望夫心在石非頑
莫愁艇子無消息盼斷秦淮第幾灣

又

靈犀初解辟芳塵斜倚瑩篴度此春一世不成如意事
兩邊齊作斷腸人瘦來不穩珠腰被畫就猶藏繡領巾

買取餘杭仙媼酒碧桃花下喚真真

又

小姑生長住青谿仙樹菁蔥玉洞西空有閒情隨海燕
不堪文彩對山雞人前作別情難語夢裏相尋路易迷
已負羅浮好花信垂條驚見綠陰齊

又

莫擬當年舊苧蘿傷心不唱采蓮歌才生紅粉鬚眉薄
愁在青衫涕淚多錦帶暗睽魚子纈畫裙羞捲麝香羅

五湖肯逐鷓鴣夷去一舸何辭着短蓑

雨中過丹間六堂看梅

愛花不惜為花行
着屐衝泥倒玉罍
穿徑已知塵欲靜
開軒正覺影同清
雨中漠漠幽香遠
夜半垂垂艷雪明
我擬借君堂上卧
巡簷三日待春晴

西柯攜尊同景州東湖維式諸君見過分得十
灰時潛兒將有楚行

春盡俄驚遠棹催
南邨猶喜素心來
忘憂最愛狂奴態

賦別還徵上客才竹以蔽塵將徑繞花知弄影向燈前
傷離老眼無奇字莫擬楊家有濁醅

書雲先生招飲看花時庭前芍藥鶯栗酴醾爭

艷即席漫賦

老為花狂更復誰名園曲宴喜追隨三春勝事稱婪尾
一苑香風抖畫眉步障紫絲空爛漫地衣紅錦最葳蕤
主人愛客能行樂顛倒難將爛醉辭

再疊前韻呈書雲先生

未到高齋香滿扉，俄驚燕瘦與環肥。
檻前鬪酒杯頻倒，座上題詩筆若飛。
月照紫衫迷眼色，花爭紅袖逞腰圍。
最誇郢客陽春奏，不羨當筵金縷衣。

次仲雲姪韻答贈

羣從君推玉筍班，新詩引我一開顏。
經時不減三年跡，過日堪銷九夏關。
當代凌雲應北闕，誰家詠雪更東山。
陳留竹下多佳興，盡倒葡萄莫便還。

梅書師六舟次叔定蛟門同家劍宜小集花下

衡門久矣謝車塵
蓬逕何期擁簪頻
檻外繁英多艷友
座中佳客盡詞人
酒逢歡飲偏宜夜
花為遲開賸得春
多少竹西池館在
誰家索句最清新

飯後

皓首曰歸百未成
盤殮終日意難平
老妻早報蒸梨熟
客子誰知種菟清
與世何功甘飽食
于時不合但徐行
無端苦覓驚人句
攬鏡頻看太瘦生

夏晚

千山返景欲蒼茫倚杖柴門到夕陽雲為隨風成厚薄
天因釀雨故炎涼間中膠漆惟歡伯老去功名付睡鄉
屈指幾朝秋漸爽桐冠蕉帔竹匡牀

梁雪立秋日有約泛舟辭而未赴

從來癖性懶衣冠觸熱何堪泛碧湍南郭賞心人自好
北窓跂脚意常安風摧高葉辭金井雪沁甘瓜剖玉盤
此際秋懷正無賴白頭那及少年歡

得鶴問書次同孝威趙客見憶韻

兩年落盡粵關梅望遠頻登趙尉臺
柳水雲迷千里迴
洞庭風送片帆來
貧歸但有花盈逕
遠夢難同酒滿壘
深謝諸君能見憶
新詞絕勝賀方回

又

擬下驚濤惶恐灘
便來邀笛更尋桓
可堪少婦乘鸞恨
竟失良朋鱸鯉餐
碧樹常牽三月夢
黃花猶耐一秋寒
武昌泛雪能乘興
欲問齊山路幾盤

中秋坐雨次伯御見懷之作

桂華着雨又經年獨坐虛齋憶汝賢三五難尋湘女夢
十千空負酒家錢樓臺但覺和雲冷簫鼓誰能喚月圓
幸得一篇青玉案徘徊高詠曲欄前

送家仲雲歸里

高天霜落木初飛送別河橋拍翠微作賦最憐人善賦
思歸常羨客先歸向平婚嫁隨時遣阮籍行藏與世違
子去須為余料理豐南猶有舊魚磯

送家伯御歸里

東閣官梅漸作花
延陵才子又還家
舟過鍾阜山千疊
門對豐溪水一涯
笑我暮年方解組
如君佳句合籠紗
為傳逋叟思鄉夢
長繞燕峰幾片霞

次石屋禪師韻

無事身如一葉輕
閒過竹院暢幽情
遙知明月禪心靜
長看浮雲世態更
忍草悲花堪坐對
清泉白石共經行
空慚擾擾塵埃內
門外時時金磬聲

送亦韓弟廷對之京

聖朝虛席待凌雲才子名成冠一軍兩制久傳中舍誥
三唐初變左臺文官梅度雪枝爭發繁杏臨春蕊漸紛
相送此時無可贈吾家風節古來聞

送雲逸侄歸里

驪歌初唱客將還送別隋堤柳一灣四野寒烟過赤岬
千峰晴雪望黃山協來吉卜懷應喜攜去哀辭淚欲斑
從此南陔須再補澄溪家住白雲間

無題

暖從寒際見春恩香雪蒙頭問酒尊花解依人多傍檻
月能留客向當門煨殘早喜蹲鴟熟夢醒虛憐小鳳存
或是野人思獻曝朝來常自倚藜根

元旦立春

勝賞今年併歲初東風吹出曉雲舒青龍幡下三元會
白獸樽前五穀書彩樹辛盤吟未了紅椒粉荔樂何如
酒人贏得多佳興醉向梅花思有餘

予目失明遇方君青來以金針治之因得復明

作詩三首

每羨庭中雞犬行頻年觸柱廢將迎何期元化非常手
竟得長康未點睛殘帙乍開逢舊友好山重過憶前生
也知天意多相警青白從來悔太明

又

左丘何意啟重翳信有神功破世迷豈可開眸容寶屑
果然刮目用金錐空憐子敬驚相待且喜昌黎手再攜
卻笑幾時雲霧裏那知歧路別高低

又

敢言盲目不盲心銀海何緣五色侵與世冥頑原自昔
看人輕薄又從今翻憂識字還多事但恐勞神是苦吟
惟願隨君週海內盡教肉眼受靈針

早春雜詠初四日偕家巢薇同作

一東

浮蹤正擬住牆東兄弟情歡此暫同彩筆紅箋新節氣
椒漿荔粉舊家風經旬餞臘知春早四日逢晴驗歲豐

簫鼓一時喧里巷，可堪高詠在花宮。

二冬

融融趙日已辭冬，有約開樽向鷺峰。
棠葉數枝迎節早，梅花一樹受春濃。
人因愛客頻扶杖，僧解留賓不打鐘。
共說謝家饒勝事，池塘草色漸茸茸。

三江

鮫冰片片斷春江，麗景初生照石幢。
此日香清開竹戶，有人詩瘦對松窓。
爐聲沸雨停幽鶴，幡影搖風吠小龍。

攜手正須遲訪戴肯教離思動吳艚

四支

牡丹豈復畫燕支愛爾能為絕妙詞青眼幸當無事日
白頭同說少年時江湖身老名空在山水情深意肯移
漸喜東臬能破凍一犁春雨未嫌遲

五微

空說當年杜紫微鷓鴣啼道不如歸萼絲未厭吳儂箸
荷葉寧為楚客衣天下有心常擊筑人間多事莫開扉

五陵得意皆年少，裘自翩翩馬自肥。

六魚

過河何必歎枯魚，已見韶光到敝廬。
度歲正同人磊落，當春寧肯氣蕭疎。
花香燕尾頻移榻，松長龍鱗獨著書。
宣室漫言思賈誼，老人今已辦柴車。

七虞

太平今已是唐虞，愚谷猶來本自愚。
漫道芙蓉如錦字，可看薏苡似明珠。
拚將東海常銜石，敢向南山更捋鬚。

耕鑿獨慚無以報元朝遙拜倩人扶

八齊

莊叟空言物可齊
閉門聊復卧
溪西池中草長魚初暖
簷畔花開鳥便啼
時事何須憂水火
故人今已判雲泥
閒來欲訪逍遙谷
兩袖春風六尺藜

九佳

倒餐甘蔗豈云佳
懶漫原知世不諧
爛醉已忘歸丙舍
鼾眠無復聽庚牌
清宵看月揮松麈
侵曉澆花濕笋鞋

獨有風情殊未減高冠時挂美人釵

十灰

夢斷東華意已灰簷前猿鶴漫徘徊新春不了前春恨
舊雨寧同今雨來十載賓朋多草莽三春花月幾樓臺
人生榮落尋常事甘向深山老不材

十一真

谷口行同鄭子真湖邊箕坐看忙人忍教鷗鷺頻相待
却喜禽魚漸可親竹葉醉來能耐老桃花深處不知貧

閒中懶作淳于夢未到南柯即欠伸

十二丈

幾歲臨邛只賣文欲談前事向誰云彈琴不愛同中散
擔墓曾教學右軍百歲聲名甘老放一時心事觸微醺
風光却向人前說占得揚州月二分

十三元

頁下看看又起元簷前長自負朝暄吟殘芳草春生屐
開到梅花雪滿軒楊氏才人多白鳳王家童子有青猿

一門詞賦吾心足書畫何須更納垣

十四寒

栖遲寧不探春寒漸喜山中日月寬次第已看花婉孌
起居先報竹平安香浮盞內新開甕露滴窓前共染翰
多少樓臺好風景莫教閒殺玉欄干

十五刪

賦得新詩手自刪苔花生澀傍門闕方期客泛郎官水
又見人過學士灣富貴難求終歲飽神仙贏得一生頑

盧郎空有逢時法不向終南更往還

一先

似奕都求着着先寧知冷眼在枰前詩成白傅吟花下
曲愛紅兒度酒邊百尺幾曾容客上一寒端不許人憐
請看庭畔桃和李青帝來時即競妍

二蕭

鏡中雙鬢已蕭蕭髀肉于今亦漸銷克隱不須栽薜荔
漫藏何用覆芭蕉才人勝事歸梁苑高士新篇在灞橋

試問鴟夷隨便泛何如吳市好吹簫

三肴

莫貪椒醢與蘭肴早結山中一把茅
獨往不須頻問路倦飛何以竟歸巢
飲當醉後闌難握棋到殘時劫漫拋
貴賤人情吾已曉一觴惟合對窮交

四豪

羸螺何知是二豪樽中常自有葡萄
成仙那用多尋術避世寧容更種桃
莫羨漢庭徵四皓獨憐吳地有三高

春來鶯燕渾無恙啼血誰憐杜宇勞

五歌

酒酣斫地漫高歌一笑曾逢春夢婆
寧更以閒為寂寞何如將壽補蹉跎
江雲渺渺飛黃鶴岼草青青放白騾
歸去來兮鑑湖上此間應不畏風波

六麻

不求槐棘問桑麻人事從來似搏沙
南畝只教多種秫東籬猶有未開花
謝安攜妓身將隱陶令休官鬢已華

料理百年無善計一琴一鶴且移家

七陽

亦願揮戈學魯陽雙丸何意向人忙李家那得千頭橘
召伯猶存幾樹棠陌上花開應緩緩田間麥熟正穰穰
春流但可容吾濯清濁何須苦較量

八庚

半窓梅月影庚庚只合安閒過此生栽得藕花留宿鷺
種將楊柳待啼鶯熟思惟可藏頭卧飽飯還宜捫腹行

拋却硯函同筆架從今應不受虛名

九青

柔嵐幾疊到門青春半新蒲繞綠汀折得花枝貽內子
分來菜把向園丁耦耕切莫虛農月垂釣終須老客星
自有珠光能映水安能熠燿比秋螢

十蒸

洞邊花發似霞蒸鼓棹仙源我尚能隋苑韶光誇上苑
延陵心事在東陵天清應有銜書鶴地僻全無點玉蠅

他日臨風更相憶裁詩莫惜剡溪藤

十一尤

擬向人間絕怨尤拂衣何必慕丹丘已教納月多開牖
却為看山別起樓燕頤幾時歸絕塞虎頭今日畫滄洲
苧蘿若有人同在艇子何煩問莫愁

十二侵

久謝塵污莫再侵碧山深處已投簪吹毛不少泥中劍
焦尾誰知爨下琴赤日上天寧有意白雲歸岫本無心

螭頭虎尾君休問釀熟梨花好共斟

十三覃

風雨時行化已覃泥蟠尺蠖亦心甘江河世事人難料
丘壑生涯我自諳陶令門前多綠柳戴公園畔兩黃柑
安身更有逃禪法彌勒應來共一龕

十四鹽

逢君我竊恧無鹽欲畫長蛾轉自嫌最羨格高如謝朓
獨憐才盡似江淹扶頭酒醒花連屋叉手詩成月滿簾

把向五都人索價也須一字值三緡

十五咸

有懷無路問巫咸獨賦新篇日滿函桂樹詞高留白社
荆花夢好隔蒼崑離鴻欲去翻愁網驕馬將歸更弄銜
只剩惠連詩句在朗吟猶勝把春衫

偶題

絕似神仙陸地行詩瓢畫帙酒經程長松未改凝寒跡
野菊曾知去國情自是青山多宿好重將白水締前盟

五陵此日多輕薄
皂帽惟應避後生

又

花發闌干笋出籬
春來蹤跡似丘遲
一錢不愛惟留客
萬事都忘只好詩
夢破那堪推枕日
棋高偏在拂枰時
人間蠻觸多心事
說向先生總不知

又

浣花溪上一村孤
欲倩茅生更補圖
自愛娛情松與竹
都忘輯瑞穀兼蒲
紅兒歌舞非他日
白傅勾留是此湖

却笑丁郎無傲骨等閒輕拂相公鬚

又

吳市誰知梅子真飄然此日剩輕身白衣豈必攜官釀
紅袖偏宜拂壁塵泉石可留天下士烟霞絕勝世間隣
籃輿醉後誰能舁兒子門生共幾人

林蕙堂全集卷二十

欽定四庫全書

林蕙堂全集卷二十一

湖州府知府吳綺撰

亭皋詩集

五言排律

初春友沂邀同仙裳定九諸子泛舟平山得楊
字

山川不易好終古念垂楊正月人初暇初春景正芳遙

憐幾兩屐共負一吟囊飛蓋隨王粲交衿集謝莊挂颿
牽杜若吹笛上沙棠曲岸吟朝旭浮橋踐曉霜冰漸鱗
始躍寒峭羽猶藏荇蒂鸚哥綠芹芽燕子黃娟娟分鷺
影的的入鷗鄉毛女逢挑菜秋胡問采桑停車尋月觀
響屨看雷塘拍點遺墟矗低回舞榭荒可憐隋大業不
及魯靈光覆轍羞秦帝雄才慕漢皇關雎千帳錦養鶴
九州糧賜柳稱官姓奴螢選夜粧龍船飄綵纜犀管溜
絨韁一鏡柔情誤三更艷曲忙才堪酬結綺幾見起阿

房尚憶當全盛何曾諷太康有山皆綠酒無水不紅廊
駐馬臨邛客調笙下蔡倡越羅裁翡翠趙瑟畫鴛鴦繡
幕留張碩珠燈醉沈郎林陰驚寶彈鶯語落銀牀金粉
矜時俗烟雲互渺茫地間連建業塵已蔽漁陽石破天
心缺嵐枯嶽勢涼鳳凰辭故嶺麋鹿愛歡場宮竟迷仁
壽途空認蜀岡紫苔銅雀瓦青草玉魚璫怪鼠啼棋墅
妖狐鬪射堂耕夫終落落遊子或俚俚廣武悲何極新
豐澤漫忘興衰信有託慷慨實非常遡澗頻迴棹沂波

為舉觴寺生前代想僧剩六朝裝拂碣思南宋摹碑記
大唐詩存名士影鈿拾美人香我自難成醉天應莫遽
涼驚飈僵鳥雀斜日古牛羊望望暮烟碧遲遲暝色蒼
曹劉爭壁壘蘇李又河梁雪暗鴻歸處星稀鵲繞方橫
琴流素徵倚劍發清商杜宇宮花濕琵琶墓棘長開元
客自老德祐史難忘去去聊彈筑行行且賣漿桃源失
晉魏蘭渚徧瀟湘憑弔徒揮涕城鴉噪女牆

集金魚池

勝地環芳沼佳辰洽令儔蓮塘晨露爽槐序午風柔遂
有襄陽興言尋濠濮遊朱鱗方競躍金鬣正羣浮唾影
斜暉亂噉花夕景稠客心同杜老吾意學莊周布席臨
丹檻移觴對碧洲風輕知柳直香靜得荷幽藻影流文
裕冰絲接素甌仰瞻通帝闕高覽極皇丘急管分諸伎
華塵散五侯醉歸殊未厭清咏若為酬

午晴至豐臺芍藥花下

過雨芳林曉高樓景物新雲開成小霽山午帶餘春遂

騁尋花騎如逢洧水濱分畦同闕冶異畹各含顰泣露
枝全弱迎風態更真夷光非一伴飛燕有千身綠映殘
霞絢香翻宿霧勻信堪稱艷友何必贈離人留借朱絲
障歸簪白氎巾明朝誇盛事傳語徧城閨

壽秦郵王相國三十六韻

莘郊當輔乙松嶽早生申淮海文章重瑯琊閎閎新鳳
儀恒在嶺龍躍已離津單父琴歌韻桐鄉俎豆親挽鈴
通鳥訴擊笏斷蛇蹲吏畏徐宗說時稱盧子均含雞登

錦署鳴鶴上丹宸聚米知無匹論兵覺有神露帷施曲
蓋霜鉞擁雕輪朝譽尊裴度軍威懾寇恂士騰懸幟影
敵避屬車塵柳肅轅門令蓮香幕府人列侯趨玉帳八
陣望綸巾方叔鴻猷壯元公駿業伸膺圖逢聖代調鼎
用純臣盛吉持朱筆棲筠佩絳綸東山聊夙駕西院遂
持鈞九伐咨洪禮三留拜大真瑤環酬舊德金筯錫殊
珍鵠尾開黃闥鸞坡接繡闥掀髯談國事造邾請斯民
共羨紗籠賁還觀水鏡掄松高寧讓直桂老不辭辛却

簿空資限平衡待隱淪升臺招駮駟入畫寵麒麟病為
蒼黎痛恩煩赤帝詢勁緣橫豸角逆匪觸龍鱗會見回
天力茲逢降昴辰黃鍾傳始律彩線近初晨牛馭迎函
谷熊飛起渭濱燕山森寶樹漆園頌莊椿設幔瀛洲客
揮觴雪苑賓諸昆忻共籍小子幸依鄰覲德瞻韓久憐
才說項頻一陽初遇復千歲漸宜春願得浮瓊爵長言
奉錦茵

花朝月下限字十韻

芳菲傳令節春事自今齊不謂花前賞還分月下題韶
光初撲蝶靜夜獨聞鷓粉細梨金澹絲輕柳乍低風烟
忘冀北景物擬瀼西艷唱朝迴雪仙裳夜舞霓紅陰紛
廣院碧影照清溪客意耽幽選余心託簡樓吹簫思舊
里撒燭過平畦未盡徘徊興頻將素手攜

寄上大司馬公百韻

紫緯鍾金斗蒼靈協寶符自天昭世德維岳誕真儒吐
篆遊麟異徵休集鳳殊賦棋誇李泌與字美陽烏入夢

嘗探錦臨關即棄繻才名高賈董物望起韓蘇鴈塔年
如玉雞林價比瑜人爭看一衛戶盡誦三都早合臺登
駿聊將烏化鳧綠楊眠曉月紅杏潤春酥糗備千軍飽
城當百戰孤萑苻逃境外桃李粲庭隅眷注隆青瑣風
流豔紫衢吹簫秦鳳叶捧饌謝螺俱淑女逢之子文人
悅彼妹牛衣多涕洟馬仗肯含糊彈事聞修竹籌邊見
伏蒲攀裾談禁密借劍斥姦諛顛竟忘投鼠豪應欲射
狐九歌逢彼怒百折詠卬須不幸言終驗無端口卒瘡

塞窮還失馬巢覆尚探雛北寺悲囊首南冠悔剥膚
天留彥博

聖代得夷吾畫省歲餘藁清卿足美醺笙鏞賡

帝載琮璧會王圖履尾旋遭忌盟心豈自渝婁公甘拭
面元相已銜鬚寵擬三專渥寬先五教敷度支權益重
版部眷恒紆弄印無堯者垂紳似絳乎神羊威截嶠驄
馬步跼蹐色正人難繼言危道似迂騶知清德減樓畏
直聲塗無禮嚴鷹隼多讒畏虎軀到天松愈勁涉浪梗

堪虞保護煩

英主遷延過險途先生官獨冷短簿職空劬度嶺吳丞相浮湘楚大夫覲消臣節顯節徽

睿情孚慈佩心仍簡蘭臺跡未逋平民邦用典作士帝稱俞赤子皆求活蒼生久茹荼囚知無死法公每向人吁漉酒消秦沴封章賜漢酺雞竿頻執奏犴戶鮮號呼喜氣騰丹棘

恩光動白榆爽鳩增上秩司馬晉中樞太乙軒皇陣文

昌上將謨律惟張九伐邑不誠三驅

王者方居正宵人敢負嵎亂因長孺戢情待武侯輸海
蜃銷金鐸星狼靖玉弧丹宸氷鑑捧黃閣火城趨御李
思偕楚班荆憶在吳隋堤攀柳樹灣水泛茅茨有道門
庭廣無媒徑路蕪仙舟來李郭甲第啓崔盧雪苑招奇
彥星房及下駑金九公子彈繡被越人艫趙氏交羣紀
孫郎列顧厨少瑜誠卓犖端禮本華腴文愛香山俊詩
稱鄧尉臞梁生能授簡杜老善操觚湖海皆詞客江山

半酒徒杯傾紅瑪瑙筆架紫珊瑚梅嶺衣香散桐樓舞
席鋪釵光搖翡翠燈影醉攪瑜大令過桃葉嵇康就柳
株時時陪勝賞處處得歡娛日月曾無幾雲泥竟自辜
數奇嗟李廣歧路泣楊朱入雒年非昔遊梁計轉愚扣
門人走避撒燭鬼揶揄再進孫弘閣還分謝朓襦吟囊
長傍鶴游杖或懸蚨說項忘踈賤依劉振槁枯清言偕
上客故態怒狂奴劍割東方肉裘沾卓女酤校書憐魯
字執戟濫齊竽光逸寒門累馮唐薄宦拘身因酬遇重

腑為感恩鏤厚誼真千古浮蹤又五湖還鄉懷綵綬到
郡合銀菟善釀無中若空城有下菰南陽豪莫問東海
獄多誣辛苦存薑桂艱難事牧芻哀鳴飛澤鴈局促恥
轅駒羊子書三篋龍參水一盂筭簫惟刷玉蕙莎欲疑
珠夜月恒歌鵲秋風但憶鱸憂深防灌莽貧徹媿葭莩
未識于誰止仍須賴給扶新恩瞻赤舄舊好感黃壚失
道憑雙炬乘流借一壺寵知垂素手榮冀轉青矚四岳
雲將起三生露共濡勲名傳漢冊謠頌托吳歆銜玉酬

楊寶鎔金顧孔愉願言回泰律長恃濟川桴

奉答梅村先生即次原韻

人倫重鎮海祖德共延陵慧探金環協祥符玉燕徵梗
楠當世用蘭蕙早年稱經術師中壘篇章過右丞幾回
牽赤幟第一啖紅綾逸足寧超驥奇毛總讓鷹宴遊初
日炤臚唱霽華升錦有盤鵬錫盃將御膳承中涓頒露
掌天子賜雲仍寶鈿酬宵詠金蓮炤夙興魏徵真娥媚
李沆果端凝斬馬除奸諛燃犀破暗蒸只知詞賦貴豈

識諫書增東鐸家為矩觀碑路擁乘毫端生絳蕊紙色
點朱菱鑄劍開洪冶程弓釋巨棚鴈投衡岫網蛟入楚
潭習桃李榮誇狄蓬麻直比兢臣心無所黨士口自多
憎負米春山路歌騷夜雨燈周原雖板蕩魯殿獨觚稜
暫出東山駕旋耕南畝塍每橫高士塵長謝弋人矰局
為蒼生斂羹因赤手懲齡曾呼小友嵩忝預文朋玉署
辭三載瑤臺望九層別離思鄭縞展軸愛吳繒鄰燭初
分耀郵函再啓滕果蒙迴棹訪不覺扣門應梁客隨枚

馬姬宗備魯滕深情知不忝樂事已難勝坐愛衣香滿
題看紙價騰耽幽陪謝屐選勝荷虞登四水春羅滑千
峰曉碧嶒笏逢山自拄几對月長凭急舞搖珠絡清歌
墜玉繩尋花邀杜牧倚樹媿毛曾梓澤誠何有蘭亭獲
共登文章君迭霸粥飯我如僧自笑詩城破還驚筆陣
崩鈔從鸞掖重遊許兔園矜衆垓恒宗岱凡流敢混澠
序傳皇甫謐刻羨李陽冰人謂真稀有吾言得未曾效
顰徒見醜學步轉難憑但愛朱絲暖仍憐綠酒澄寫辭

燒徑竹挿架引溪藤賦擬三都左書賢十部弘肩堪樓
白鳳尾合附蒼蠅不識千秋後誰知二謝能

奉酬荔裳先生見贈即次原韻

清遠稱名勝登臨盡大賢每生魚鳥興多在水雲邊震
澤當吳會菰城向楚偏溪聲諸派合山色六城專自古
叢葭羨于今茂梓梗右軍初領郡崔亮後登仙酒愛程
家釀茶從陸羽煎何期來畫祭乃得奉華鸞忘分車頻
降推心席屢前九歌誇宋玉三影共張先鄴苑恒分簡

淮陽未暇眠紅燈爭飲戶碧草墜吟鞭爛醉三千竿輕
攏十五絃間階調睡鶴深夜響寒鸛語愛中邊潤行看
左右平濃霜飛菊圃翠粉落荷田繞樹誰憐鵲添衣欲
御斨雙南金錯贈七札墨痕穿典博劉公幹清華孟浩
然別成杼與軸罕步陌和阡筆陣新懸幟詩城早破堅
寫憑雞賈貴譜讓雪兒憐羣紀懷當世盧楊憶竝肩梅
花廣平賦繡被鄂君船聲艷鳴珂里才雄射策年東牆
人自望中禁句爭傳覆錦調元氣持衡別衆川官曹消

害馬相業兆鳴鵲遂有蜚言至徒勞

睿意牽乘輅疑象緯布政佐旬宣雨潤蘿村路春生鏡水
偏臣躬方蹇蹇帝簡更拳拳酹酒消秦獄懸旄震越天
八門纔聳翼九仞竟踣巔謠詠青蠅羽煩冤白鷺聯憂
傳夏侯冊泣寄子由箋暗蠹藏深窠狂蛇試老禪九閣
開斗沫一笑過雲烟暫起算鱸思聊將蘭杜搴三花開
寶樹五色產嬰蓮問古臨若雲尋幽趣筍簍精神同卓
犖眉宇兩嬈娟欲繡平原像言傾下若泉江山添賦力

歌管奪愁權坐拂窪樽石偕搜韻海編禮非因我設言
豈待人詮住訂登臺嬉遊尋傍水緣子猷惟看竹夷甫
不言錢異彩文相煥同官律互旋千秋寧偶爾一代豈
徒焉媿我稱疎慢逢君快賞延塵頭腰自折紙尾字空
填有畏慙驚鼠無成嘆墜鳶尋花空着屐燒笋不成籩
昌谷囊裁錦柯亭笛用椽深情何鄭重奇藻更芊綿忍
聽歌三疊相思月一弦河梁衣共把湘水佩同捐遠道
思投轄榮名各勉旃長留白雪唱高映紫薇躔

懷漢高士梁鴻

時微思介節道否重幽人鳳覽輝常下龍潛德始神交
從異代合志向屈時伸養癖存孤性含貞保大倫獨留
心跡在長使道風新漢代曾遺俗梁生本絕塵著書高
自許減竈介難親椎髻閨中友耕田谷口身行歌原有
託名姓或非真直欲同園夏寧惟似井春明王生見忌
烈士死相隣舉世方趨熱千秋只愛貧高宗行遯久舊
史展看頻笑我同為客如君竟未臣弋徒翔遠鵲網不

絳祥麀越更空思越秦人忽去秦傷時思往事望遠屬
良辰古道誰能許遐心未易陳緬思千載上嘯咏五湖
濱誰復能逃世吾其欲問津

無題用韓致光韻

檐鳳承初日簾犀辟暗塵
鑪香雙穗夜鏡影百花晨
但惜歡情甚寧知別恨新
魂離張好好腸斷沈真真
夢醒惟三嘆愁多豈一顰
垂楊難買馬芳草不回輪
燕嫩還矜羽魚勞轉惜鱗
祇傷飛絮早輕度小桃春
炊玉悲游

楚彈箏憶向秦珠分滄海岸星隔絳河津但覺情如醉
都忘味有珍頰羞紅不耍眉薄翠難勻密語應忘婢凝
妝或怨人長憐屏曲曲誤聽車轢轢

瑞麥

仁愛天心厚艱難帝道光聖朝寧待瑞豐歲即為祥兩
社占神應中牟卜世昌八三時不爽五七種非常夏已
先秋盛金仍得火襍本同知共朔衆附兆歸王浪欲侵
隋柳陰堪映召棠莖看連理并類似木蘭長致此寧無

故從茲可漸康王師雖未偃吏治早徵良信有中和具
能將水旱償願言羞寢廟持以示遐荒

病足十二韻

老至方多患春來舊疾萌半才如鑿齒全欲似淵明未
可扶藜拜難為倒屣迎終朝橫几榻竟日掩柴荆豈少
飛揚意何堪纂蹶名此中寧有鬼得住且由卿抱膝間
孤咏咸腓笑暈征孝長如鷺宿跡不與夔爭身靜奔趨
少心空險阻平歧途知免累捷徑豈關情痺許王徽讓

憂憐樂子誠以茲甘鬱鬱長得謝營營

春日閒居

歲序青陽好幽棲覽物情才疎甘皂帽命薄謝朱纓稼
圃聊安分樵漁不近名卧聞雙蟻鬪夢破百禽聲獨起
惟攜篠閒行或抱罌灌花成曉課時菊代春耕客至憑
鶯報僧來遣鶴迎苧袍隨體便紗幘着頭輕麻熟青精
飯葵香錦帶羹有時攤卷軸盡日對棋枰枚馬梁園賦
求羊將徑行句從無意得杯愛不時傾揮麈餐常費談

經席屢橫伶玄曾作史子墨舊為卿水任鳬鷗戲巖無
猿鶴驚淳于談每絕輔嗣論偏精意氣由時輩文章付
後生陽秋非所事月旦豈容評櫻笋厨方盛蒲荷水漸
平吾儕今已老猶幸見河清

小集克敏堂遇雪分得六麻

春來不擇地昨日到山家
藁已開雙甲梅纔吐一葩幽
人高齒屐詞客短轅車
坐密毡爐煖談深蠟炬斜
醇醪浮栢葉生菜饌片芽
得歲雲初合迎年霰轉加
影高都

着樹點急不成花
郢國歌同發
梁園簡未遐
光應迷上下
韻各關尖义應自同欣賞寧為玩物華

苦雨二十六韻

未省蒼穹怒如將赤庶
嗔愁霖真有客
旭日竟誰賓
屢見商羊舞
難教石燕馴
水行將木毀
陰德致陽屯
淅瀝初逾歲
滂沱忽累旬
人情空向曉
天運欲無春
簷溜時時亂
堦痕處處湮
連牆多壞屋
隔巷少停輪
苔蘚鮮紅侵
席蓬蒿綠滿鄰
但聞泥滑滑
不見石磷磷
婢怨嗟沈金

樵歸抱濕薪柱歌還長茵池漫不生蘋是漏難為補如
波不易堙自冬將及夏徹夜更無晨入市乘商筏當門
插釣綸溪流迷舊岸田畔入通津未可同甘澤徒能虐
賤貧兩岐應失望五德適逢迤邐吏誰能覺青皇似不
仁嗟余恒獨息對婦共長顰南畝憂方大西窓聽已頻
餘寒憎繡被新黥展羅巾絃潤琴慵理書沾帙懶陳不
歌應可笑無病轉堪呻得意憐蛙黽潛蹤嘆鳳麟會當
逢暘谷終免笑波臣

閱江樓晚眺

端州江海匯一水貫遐區奇相承坤德危樓瞰震隅緣
梯情已爽倚檻眺還紆況值清輝澹無逢暮景徂千帆
過遠樹萬井出寒蕪發鼓鳴官舫連檣集市艫依依投
晚浦渺渺泛修途共指層城壯同看傑構孤東溪分白
管西郡接蒼梧峰束羚羊峽潮通大鯉湖古今形自勝
昏旦候常渝海近殘霞變波寬夕照鋪野雲生灌莽村
火雜菰蒲蠻舶高山岳漁舟小鴈鳬客心悲日夜旅望

極川塗寒汐聲來去層巒色有無幾回空徙倚獨立轉
踟躕荒棋藤空老殘碑蘚欲枯可憐兵甫息終賴力能
扶擬作滕王序閻公興本殊

七言排律

秋日大獵

白露涼風轉素商紫微星宿動文昌戎車吉日周王制
羽士期門漢蹶張天外金鉦屯細柳花間玉輅動長楊
三驅共仰飛龍駕七萃新開射雉場武庫神兵通太乙

天閑上駟映東房鍾山建翮多貞白楚澤修禳有茹黃
都護戈矛森鶴膝將軍弩矢號魚腸翔鳥始見征塵溢
搏虎仍觀列炬揚武帝輿徒連灞滙荆人羅爵徧衡湘
雲霞亂雜旌旗色山水平分劍戟光木落銀絲堪縱擊
沙平珠絡好騰驤執殳猛氣曾無敵出殼雄威定莫當
並羨騶虞能赴節早驚鳧兔已迷方丹毛灑墜雕弧下
繡翅離披翠輦傍遂使龍顏輕一笑轉憐猿臂擅諸長
止綏任駭公孫鴈飲至還羞穆滿狼親向璇宮調玉膳

重臨寶幄賜三漿中林貌虎吞雲夢後乘熊羆託渭陽
再見鎬京歌燕喜寧煩洛汭刺禽荒相如諫牘空千古
虞舜垂裳自九章

壽留村制府

地天景命昌乾統河雒禎符誕晉侯禹甸衣冠王會盛
延陵禮樂祖功悠子顏壯業超倫輩處默清操絕等儔
武本用文成勝畧才原藉德具弘猷花封幾處棠陰滿
蓉江多年黍澤稠潔可字民非枉譽誠能格主豈虛求

八階特進恩踰次三錫頻加寵獨優丹筆含薰吹牘尾
朱干竟夜拍旄頭漳濱萬弩收烏石嶺表雙旌啟碧油
雷動更無風以散火剛還濟水之柔傳刀肯使狐妖響
破柱常將害馬搜楫鼓鯨濤消戍壘樓高象嶠裕邊籌
庭雖有甕何煩運篋自無香豈待投孟獲皈心欽秘算
尉佗稽首服神謀白狼遠貢金城曉翠鳳斜飛玉帳秋
客聚蘭臺欣再見賓依蓮幕慶陪遊如山未許齊隆岳
似海惟應納衆流謝傳棋枰誰與敵燕公詩句孰堪酬

生申此日方歌雅建子當時早演疇黃老五千寧慢學
蒼黎百萬正歡謳孤蹤幸共綿瓜蔭積悃徒懷獻藿羞
北斗挹漿分相鼎東華添錄翊宸旒

五言絕句

鴛鴦

朝上芙蓉渚宵歸菡萏池生來便同宿不解有相思

怨詩

朝來粧閣下不復畫眉灣為恨郎行日遮郎是遠山

又

種荷塘水裏莫種小橋前
花開同一藕分作兩邊蓮

題畫

茆屋淨無塵
溪樹青疑雨
中有捲書人
坐與春山語

美人覽鏡

對影照微紅
含愁鎖雙翠
却怪鏡中人
如何亦垂淚

美人騎馬

髻整拋韁處
裙鈎上鐙時
停鞭問阿姊
何處不男兒

遠望

波遠魚難渡風高鴈不行故園秋草外一半是斜陽

長安一片月

車馬塵初歇笙歌響又新長安好明月却照利名人

酒醒後枕上聞鴈

月斜將雪影併作客意明孤枕橫殘醉蕭蕭度鴈聲

空山讀異書題黃皆令畫扇

翠壁疑無路晴谿絕世塵窓前留古冊恐是避秦人

落花

紅顏原自好，經雨作香塵。
獨羨銜泥燕，高懸一片春。

雪望

一夜江南雪，高樓獨閉關。
興亡天不管，埋盡六朝山。

尋文游臺不得

曠野低殘日，高雲沒亂榛。
不知江海內，何處著詞人。

子夜四時歌

花裏紅窻靜，東風吹欲開。
却嗔芳草色，不趁馬蹄來。

又

人愛蓮花好蓮心只自知
生來多苦意却為藕中絲

又

小院秋逾寂淒涼不可禁
愁心如落葉一夜一堦深

又

無罇風偏入燈寒影更搖
恨應難比雪能積不能消

嶺南四時旅懷

江南亦有花嶺外花開早
辛苦看春風是處王孫草

又

南海苦炎蒸終歲亦如夏安得北窓眠共說義皇話

又

得雨始為秋秋來不得雨始知宋玉悲不為秋風賦

又

歷盡不曾寒得寒反為異獨憐流落人有裘不嫌敝

菩提葉笠子

云何一片片遮得斜陽住向上亦何為由來本無樹

櫻團

不錦復不緝何時乃能破試語行脚人且在此間坐

方竹杖

未遭規與漆留得觚稜在以此孤直心登高幸無殆

癭木如意

意亦安能如如意亦何許輪囷本無材莫作王戎舞

馬當山

一夜風帆駛揮毫動世人不因王勃序誰信馬當神

六言絕句

歸雲菴次吳白雪四首

過嶺又逢僧舍沿溪都住漁家高士豐碑何處隔林遙
認梅花

又

木落更知山靜天空益覺雲閒但使欲歸便得何須
讓之間

又

山與波光相近冬將秋序初分消得樊川佳句湖田盡
卧黃雲

又

倚杖聊聽秋澗回颿却趁輕風莫訝山公未醉酒人猶
坐船中

林蕙堂全集卷二十一